



51.132  
0234  
002



Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

Blue  
Cyan  
Green  
Yellow  
Red  
Magenta  
White  
3/Color  
Black

**TIPPEN** Color Control Patches

© The Tiffen Company, 2007



助字辨略卷二目錄

下平聲

先

然

旃

全

緣

專

顛割通

聊

前

焉

偏

懸

旋

連

臯



饒

何

佗

那

和

些

加

遐

方

它同俗作他

瑕霞通

交

多

俄

麼

邪

娑

嗟

良

當

蛾通

將

長

相

剛

更

誠

平

生

成

相同

常

嘗

强

羌

行

羸

情

爭

并

甯馨附

應

登

能

勝

猶

猷同

攸

休

尋

仍 烝

曾

恆

尤

由


疇

俟

臨

今 深 兼 僉

任 堪 咸 凡





助字辨略卷二

先 漢書食貨志先是十餘歲河洩灌梁楚地固已數

困先是追原之辭也史記平準書作初先是往十餘

歲河洩觀梁楚之地固已數困初先是者重言也往

亦先是之辭此以四字為重言者也

前 漢書高帝紀前陳王項梁皆敗不如更遣長者前

猶云先是也

然 漢書高帝紀呂后問曰陛下百歲後蕭相國既死



誰令代之上曰曹參可問其次曰王陵可然少戇陳平可以助之陳平知有餘然難獨任周勃重厚少文然安劉氏者必勃也諸然字竝轉語也又禮記祭義君子之所謂孝也者國人稱願然曰幸哉有子如此所謂孝也已鄭注云然猶而也漢書張良傳漢王乃遣隨何說九江王布而使入連彭越及魏王豹反使韓信特將北擊之因舉燕代齊趙然卒破楚者此三人力也此然字亦而辭也又孟子無若宋人然又云使民盼盼然此然字猶如也又楚辭九章固朕形之

不服兮然容與而狐疑宋玉九辨然中路而迷惑兮自厭按而學誦又云忠昭昭而願見兮然露晷而莫達又云被荷裊之晏晏兮然潢洋而不可帶此然字發語辭也今陳蔡間發語猶云然完也又書盤庚用懷爾然蔡注云用懷念爾故也又詩國風胡然我念之大雅無然畔援無然歆羨荀子正名篇五官以簿之而不知心徵之而無說則人莫不然謂之不知解蔽篇強鉗而利口厚顏而忍詬無正而恣睢妄辨而幾利不好辭讓不敬禮節而好相推擠此亂世姦人

之說也則天下之治說者方多然矣史記游俠傳此皆學士所謂有道仁人也猶然遭此蓄漢書司馬相如傳若然辭之是泰山靡記而梁父罔幾也諸然字竝語助辭不爲義者也又禮記檀弓歲旱穆公召縣子而問然鄭注云然之言焉也又論語雍之言然正義云然猶是也史記孔子世家孔子欣然笑曰形狀未也而似喪家之狗然哉然哉重言然哉者深以爲是也又難經一難曰十二經皆有動脈獨取寸口以洩五藏六府死生吉凶之法何謂也然寸口者脈之

大會手太陰之脈動也二難曰脈有尺寸何謂也然尺寸者脈之大要會也滑伯仁注云然答辭愚案此然字應問者之聲既先答之後乃剖其是非不爲義者也如孟子時子因陳子以告孟子陳子以時子之言告孟子孟子曰然亦是先答而後語其不可也又孟子然後敢入又云予然後浩然有歸志然後乃也繼事之辭也又漢書萬石君傳子孫有過失不諂讓爲便坐對案不食然後諸子相責因長老肉袒固謝罪改之乃許此然後亦是乃辭然與上意有別上云

因其如此方敢入方有歸志其辭緩此云見其如此  
遂相責謝罪其辭急乃字原有兩訓故然後亦兼二  
義也又後漢書朱穆傳然知薄者之不足厚者之有  
餘也此然字猶云然後省文也又韓退之論淮西事  
宜狀事至不惑然可圖功文云兵之勝負實在賞罰  
賞厚可令廉士動心罰重可令凶人喪魄然可集事  
又云待其稍能緝綏然擬許其承繼論變鹽法事宜  
狀州縣和雇車牛百姓必無情願事須差配然付腳  
錢諸然字竝是然後疑當時方言如此故文移皆省

去後字也文史記律書因其欲然能不擾亂此然字  
猶云如是也又詩關雎序然則關雎麟趾之化王者  
之風故繫之周公正義曰然者然上語則者則下事  
因前起後之勢也愚案如孟子然則小固不可以敵  
大左傳哀公十七年武伯問于高柴曰諸侯盟誰執  
牛耳季羔曰鄫衍之役矣公子姑曹發陽之役衛石  
魍武伯曰然則彘也凡言然則皆承上語以發下意  
然者如是也既如是則當云何故云然則也又周語  
上得民心以殖義方是以作無不濟求無不獲然則

能樂此此然則猶云然後文禮記學記夫然故安其  
學而親其師樂其友而信其道夫然猶云夫如是承  
上之辭也又論語不然獲罪于天無所禱也不然者  
否也猶云不如此此辭之洩也又左傳僖公二十三  
年凡諸侯同盟死則赴以名禮也赴以名則亦書之  
不然則否辟不敏也不然則否者言若不赴以名則  
亦不書名此不然意在兩可與洩辭別也又左傳成  
公十八年若楚人與吾同惡以德於我吾固事之也  
不敢貳矣大國無厭鄙我猶憾不然而收吾憎使贊

其政以閒吾釁亦吾患也史記吳世家歌唐曰思深  
哉其有陶唐氏之遺風乎不然何憂之遠也此不然  
反設之辭辭之頓挫者也與上義又別又荀子哀公  
篇哀公曰然則夫章甫絢屨紳而搢笏者此賢乎孔  
子對曰不必然不必然猶云不盡然也又論語子曰  
其然豈其然乎其然未信之辭也又左傳襄公二十  
三年他日又訪焉對曰其然將具敝車而行杜注云  
其然猶必然愚案此與上其然義別又史記魏世家  
王曰以孟嘗芒卯之賢率強韓魏以攻秦猶無柰寡

人何也今以無能之如耳魏齊而率弱韓魏以伐秦其無柰寡人何亦明矣左右皆曰甚然甚然者深贊之猶云大是也又韓退之論淮西事宜狀自然相率棄逆歸順黃家賊事宜狀處理得宜自然永無侵叛之事自然者無所勉強之辭也又世說謝太傅語王右軍曰中年傷于哀樂與親友別輒作數日惡王曰年在桑榆自然至此此自然應合之辭也又史記范雎傳意者臣愚而不概于王心邪亾其言臣者賤而不可用乎自非然者臣願得少賜游觀之間望見顏

色自非然者猶云如其不然反設之辭也又漢書賈誼傳上因感鬼神事而問鬼神之本誼具道所以然之故所以然者推本之辭也又史記鄭世家齊襄公會諸侯于首止鄭子豐往會高渠彌相從祭仲稱疾不行所以然者子豐自齊襄公爲公子之時嘗會鬪相仇及會諸侯祭仲請子豐無行子豐曰齊強而厲公居櫟卽不從是率諸侯伐我內厲公我不如往往何遽必辱且又何至是卒行于是祭仲恐齊并殺之故稱疾此欲發明前事故云所以然者以原之亦是

推本之辭而與賈傳語氣微別又左傳僖公十四年慶鄭曰棄信背鄰患孰恤之無信患作失援必斃是則然矣是則然矣猶云是必然矣又韓退之論淮西事宜狀至于分兵出界公然爲惡亦必不敢杜子美詩公然抱茅入竹去公然者明明如此無所顧忌也焉廣韻云何也柳子厚云洩辭也顏氏家訓云焉語辭音於愆反自葛洪要用字苑分焉字音訓若訓何訓安當音於愆反於焉逍遙於焉嘉客焉用佞焉得仁之類是也若送句及助語當音矣愆反故稱龍焉

故稱血焉有民人焉有社稷焉託始焉爾晉鄭焉依之類是也江南至今行此分別昭然易曉而河北混同一音雖依古讀不可行于今也愚案於焉逍遙鄭箋訓作於何逍遙也漢書郊祀志今穀嗛未報鼎焉爲出哉焉爲出者猶云何爲出曷爲出也晉鄭焉依之焉語助辭猶云晉鄭是依也如詩國風心焉忉忉之類又孟子人莫大焉亾親戚君臣上下此焉字於辭猶云人莫大于亾親戚君臣上下也又左傳襄公二十一年若大盜禮焉以君之姑姊與其大邑此焉

字之辭也季武子以公姑姊妻庶其故云禮之以君之姑姊也又禮記三年問然則何以三年也曰加隆焉爾也焉使倍之故再期也陳氏集說云焉語辭猶所以也淮南子天子焉始乘舟注云焉猶於也愚案此二焉字竝發語辭如楚辭九章順風波而流從兮焉洋洋而爲客遠遊篇質菲薄而無回兮焉託乘而上游皆發語辭也又與安然通禮記三年問故先王焉爲之立中制節荀子禮論篇作安爲之立中制節如楚辭九辨然中路而迷惑然容與而狐疑然字卽是焉字焉然安音相近皆楚語也淮南楚地荀屈楚人故也又漢書兒寬傳寬表奏開六輔渠韋昭云六輔謂京兆馮翊扶風河東河南河內也師古云溝洫志曰兒寬爲左內史奏請穿六輔渠以益漑鄭國旁高卬之田此財于鄭國渠上流南岸更開六道小渠以輔助灌漑耳今雍州雲陽三原兩縣界此渠尙存鄉人名曰六渠亦號輔渠故河渠書云關內則輔渠靈軹是也焉說三河之地哉此焉字甯也豈也

旃 廣韻云之也詩國風舍旃舍旃鄭箋云旃之言焉

也左傳桓公十年初虞叔有玉虞公求旃杜注云旃之也漢書王貢兩龔傳舉茲以旃不亦寶乎師古云旃亦之也言舉此人而用之不亦國之寶乎顧氏日知錄云之焉爲旃

偏 畸重之辭也世說謝公因子弟集聚問毛詩何句最佳邊稱曰昔我往矣楊柳依依今我來思雨雪霏霏公曰許謨定命遠猶辰告謂此句偏有雅人深致杜子美詩杜酒偏勞勸李義山詩清露偏知桂葉濃全 也都也皆也史記倉公傳問臣意診病洩死生能全

無失乎魏志和洽傳本初乘資雖能強大然雄豪方起全未可必也李義山詩楊僕移關三百里可能全是爲荆山

懸 顏氏家訓吾初入鄴與博陵崔文彥交游嘗說王粲集中難鄭元尚書事崔轉爲諸儒道之始將發口懸見排蹙懸猶預也凡預計遙揣皆曰懸者懸是繫物之稱物繫則有不定之勢預計遙揣有未定之意故云懸也

緣 因也公羊傳閔公元年緣季子之心而爲之諱世

說雖率物亦緣其性真李義山詩枉緣書札損文鱗  
 又後漢書袁安傳今朔漠既定宜令南單于反其北  
 庭竝領降眾無緣復更立阿佟以增國費蜀志先主  
 傳注孫盛云劉備雄才處必亾之地告急于吳而獲  
 奔助無緣復顧望江渚而懷後計無緣猶云不應  
 旋 史記倉公傳病旋已索隱云言尋即已止也愚案  
 不多時曰旋旋轉也言一轉頃即如何也又與還通  
 漢書董仲舒傳此皆可使還至而立有效者也師古  
 云還讀曰旋速也

專 廣韻云單也獨也淮南子體道者不專在于我亦  
 有繫于世矣又東方朔十洲記方丈面各五千里上  
 專是羣龍所聚此專字猶云全也與獨字義別又史  
 記曹相國世家參見人之有細過專掩匿覆蓋之此  
 專字言一意如此也又與顛割通史記陳涉世家客  
 愚無知顛妄言輕威漢書張叔傳歐為吏未嘗言按  
 人割以誠長者處官此二條與專掩匿覆蓋之專義  
 同

連 頻也不絕之義漢書朱雲傳連拄五鹿君又神仙

傳河上公授漢文帝素書二卷曰余注此經以來一  
千餘年凡傳三人連子四矣此連字猶云竝也

聊 廣韻云語助詩國風椒聊且又國風聊與之謀鄭  
箋云聊且略之辭又吳志陸凱傳注當慶育百姓何  
聊趣于不急何聊猶云何且然有苟且之意與上微  
別

臯 禮記禮運及其死也升屋而號告曰臯某復注云  
臯者引聲之言

饒 廣韻云餘也杜子美詩浣花谿裏花饒笑言多餘  
也又杜牧之詩饒是少年須白頭楊龜山云外邊用  
計用數假饒立得功業只是人欲之私此饒字縱也  
任也饒得爲縱任者饒讓也讓而不與之校故得轉  
爲縱任也假饒猶云縱令設辭也

交 小爾雅云俱也廣韻云共也書禹貢庶土交正孔  
傳云交俱也孔疏云交錯更互俱之義故交爲俱也  
又詩小雅不令兄弟交相爲瘡孔疏訓作交更相詬  
病患案交更亦錯互之義也又陸宣公奏議交下不  
存濟蔣之翹韓退之集注云交唐人語猶曰卽今云

爾

何奚也曷也安也焉也烏也胡也豈也甯也孰也誰也左傳僖公三十二年公使謂之曰爾何知此焉安等辭也論語非諸侯而何此誰孰之辭也凡云非而何者明其正是此事蓋反言之又書臯陶謨禹曰何蔡注云禹曰何者問其丸德之目也又論語何哉爾所謂達者何者詰難之辭又公羊傳隱公元年元年者何何休云諸據疑問所不知故曰者何儀禮喪服傳斬者何不緝也疏云斬者何問辭以執所不知故

云者何愚案者何設問之辭也又漢書高帝紀吾所以有天下者何項氏之所以失天下者何此何字與上義相近上言何謂此言何故也又晉書王衍傳總角嘗造山濤濤嗟歎良久既去目而送之曰何物老嫗生甯馨兒世說盧志于眾坐問陸士衡陸遜陸抗是君何物何物猶俗云甚底二條義亦微別山濤言何物老嫗生如此兒盧志言陸遜陸抗是君何人也又論語夫子何哂由也漢書賈誼傳人性不甚相遠也何三代之君有道之長而秦無道之暴也此何字

猶云何以公羊傳隱元年何以不言卽位何休云據文公言卽位也愚案何以猶云緣何又孟子何以利吾國此何以猶云如何計量之辭也又論語默而識之學而不厭誨人不倦何有於我哉何有猶云豈有易繫辭君子藏器於身待時而動何不利之有此言豈有不利也世說注何有亂頭養望自謂宏達耶此亦豈有之義而與上微別上何有是正說言一無所有有字重此何有是反說言焉有如此而謂之宏達有字輕又論語能以禮讓爲國乎何有朱注云何有

言不難也又左傳僖公十五年獲晉侯以厚歸也旣而喪歸焉用之大夫其何有焉杜注云何有猶何得愚案此言無所利也又左傳僖公二十二年且今之勅者皆吾敵也雖及胡考獲則取之何有於二毛僖公二十四年除君之惡唯力是視蒲人狄人余何有焉此何有猶言何愛又吳志張昭傳將軍何有當爾呂岱傳周易有之禮言恭德言盛將軍何有盡此美耶此何有猶言如何又孟子父母之不我愛於我何哉此言父母之不我愛我必有罪但不知何罪耳所

以足孝子之心不若是愬之意徒云何者省文也又漢書袁盎傳絲能日飲亾何師古云亾何言更無餘事又漢書金日磾傳何羅亾何從外入師古云亾何猶言無故魏志賈逵傳注過其妻兄柳孚宿其明無何著孚袴去華佗傳又有一郡守病佗以爲其人盛怒則差乃多受其貨而不加治無何棄去留書罵之顏氏家訓北人無何便爾說話及相訪問諸無何竝是無故之辭無故猶云無端俗云沒來由是也又荀子天論篇星墜木鳴國人皆恐曰是何也曰無何也

是天地之變陰陽之化物之罕至者也漢書淮南王傳王視漢中尉顏色和問斥雷被事耳自度無何此無何言無他患故也又史記齊悼惠王世家居無何漢將欒布平陽侯等兵至齊匈奴傳居無幾何陳豨反無何無幾何竝未多時之辭也又詩國風何彼穠矣唐棣之華鄭箋云何乎彼戎戎者乃移之華也又史記高帝紀是何治宮室過度也陸賈傳何念之深也漢書東方朔傳受賜不待詔何無禮也拔劍割肉壹何壯也割之不多又何廉也歸遺細君又何仁也

諸何字猶云何其歎異之辭也如世說林公道王長史何其軒軒韶舉是也又宋玉神女賦夫何神女之姣麗兮司馬相如長門賦夫何一佳人兮夫何發語辭也此何字亦有歎異之義又書堯典帝曰俞予聞如何史記留侯世家漢王方食日子房前客有爲我計撓楚權者具以酈生語告於子房曰何如如何何如竝問可否之辭也又史記張耳陳餘傳始吾與公言何如今見小辱而欲死一吏乎此何如猶言何物又論語臧文仲居蔡山節藻梲何如其知也此言文

仲以知稱若居蔡一節如之何其可謂之知也又史記扁鵲傳扁鵲曰其死何如時曰雞鳴至今何如時猶言幾何時也又史記項羽紀于是張良至軍門見樊噲樊噲曰今日之事何如倉公傳嘗有所驗何縣里人也何病醫藥已其病之狀皆何如具悉而對此何如猶言何似未悉其事之形狀而問之也又柰何如何也詳四卷柰字條下文左傳莊公十一年天作淫雨害于粢盛若之何不弔襄公二十六年夫小人之性斃于勇嗇于禍以足其性而求名焉者非國家

之利也若何從之孟子昔者病今日愈如之何不弔  
張平子東京賦如之何其以溫故知新研覈是非迫  
于此惑李善云如柰也愚案如若竝柰辭此云柰何  
非是無可柰何猶俗云爲甚如此爲甚不如此也又  
左傳僖公十五年晉侯謂慶鄭曰寇深矣若之何對  
曰君實深之可若何此云若之何者無可柰何相與  
計較之辭慶鄭則直荅以無可柰何而已故曰可若  
何也又左傳成公二年苟君與吾父免矣可若何杜  
注云言餘人不可復如何也愚案此言君父既免雖

師敗不爲大患晉人其無柰我何不謂餘人也又論  
語季康子問使民敬忠以勸如之何此言何道而致  
之請教之辭也如閔子騫曰仍舊貫如之何此則閔  
子不敢直言仍舊之是故作商量之辭曰如之何也  
與季康子之云有別又詩國風天實爲之謂之何哉  
謂之何者柰之何也言無可如何也漢書禮樂志是  
邪謂何晉灼云謂何當如之何也愚案亦無柰何之  
意左傳成公二年以師伐人遇其師而還將謂君何  
杜注云言無以荅君史記禮書漢亦一家之事典恣

不傳謂子孫何文帝紀謂天下何師古云猶言無以  
稱天下之望愚案凡云謂誰何者言無辭以塞之也  
竝是柰何如何之義而意略不同謂何得爲柰何者  
謂云也云何如何也如何柰何也轉相訓又史記禮  
書孝文卽位有司議欲定儀禮孝文好道家之學以  
爲繁禮飾貌無益于治躬化謂何耳此言繁禮非實  
但在躬行教化如何耳與柰何義別又詩國風云何  
吁矣吳志孫討逆傳策因往到融營下令左右大呼  
曰孫郎竟云何世說東亭問淞岡道人曰弟子都未

解阿彌那得已解所得何云云何如何也又漢書王  
莽傳國家所以服此美膺此名饗此福受此榮者豈  
非太皇太后日昃之思陛下夕惕之念哉何謂亂則  
統其理危則致其安禍則引其福絕則繼其統幼則  
代其任師古云何謂先爲設問後陳其事也愚案如  
史記田齊世家中國白頭游敖之士皆積智欲離齊  
秦之交伏式結軼西馳者未有一人言善齊者也伏  
式結軼東馳者未有一人言善秦者也何則皆不欲  
齊秦之合也孔子世家丘聞之也刳胎殺夭則麒麟

不至郊竭澤涸漁則蛟龍不合陰陽覆巢毀卵則鳳凰不翔何則君子諱傷其類也史記項羽紀陳餘亦遺章邯書曰白起爲秦將南征鄢郢北阬馬服攻城略地不可勝計而竟賜死蒙恬爲秦將北逐戎人開榆中地數千里竟斬陽周何者功多秦不能盡封因以法誅之儒林傳黃生曰冠雖敝必加于首履雖新必關于足何者上下之分也何則何者竝先設問後陳其事也又詩小雅彼人之心于何其臻于何言在何所以爲幽王之心不知其所屆也又漢書禮樂志

訾黃其何不徠下何不猶言如何不省文也又漢書賈誼傳陛下何不試以臣爲屬國之官以主匈奴此何不是商量之辭與上義別又左傳襄公三十一年孝伯曰人生幾何幾何言無多時也此與漢書匈奴傳居無幾何義別史記倉公傳詔問故大倉長臣意方伎所長及所能治病者有其書無有皆安受學受學幾何歲此幾何猶云幾許問多少之辭也左傳襄公二十九年裨諶曰是盟也其與幾何其與句絕言此與不盟相去無幾許也又漢書雋不疑傳廷尉驗

治何人竟得姦詐師古云凡不知姓名所從來皆曰何人愚案如後漢書來歙傳臣夜人定後爲何人所賊傷中臣要害魏志許允傳有何人夫未明乘馬以詔版付允門吏曰有詔皆是不知姓名之辭也又晉武帝荅司馬孚等詔本諸生家傳禮來久何至一旦便易此情于所天宋文帝與江夏王義恭書性之所滯其欲必行意所不在從物回改此最弊事宜應慨然立志念自我抑何至丈夫方欲贊世成名而無斷者哉何至猶言豈有

多 史記秦紀佐舜調馴鳥獸鳥獸多馴服凡云多如何者強半之辭也又後漢書自敘觀古今文人多不全了此處此多字與頗字相近言不了此處者爲復不少也又魏志陳思王傳注以孔璋之才不閑辭賦而多自謂與司馬長卿同風鍾嶸詩品袁淑詩平平百多自謂能此多字猶云盛也廣韻云多眾也眾盛義同猶上林賦所謂盛推雲夢者也又韓退之荅李渝州書乖隔年多年多猶云年餘又通作祇論語多見其不知量也正義云多猶適也所以多得爲適者

且字彙田  
古人多祇同音左傳襄公二十九年多見疏也服虔  
本作祇見疏解云祇適也晉宋杜本皆作多張衡西  
京賦云炙炮夥清酤多皇恩溥洪德施施與多爲韻  
此類眾矣故以多爲適也

佗 廣韻云俗作他今通用愚案與它同史記高帝紀  
于是沛公乃夜引兵從他道還他道別道也又諸餘  
之辭也儀禮聘禮遭夫人世子之喪君不受使大夫  
受于廟其他如遭君喪鄭注云其他謂禮所降史記  
文帝紀佗不在令中者皆以此令比率從事漢書文  
紀佗作它韓安國傳所推舉皆天下廉士賢于己者  
于梁舉壺遂臧固至它皆天下名士師古云于梁舉  
二人至于他餘所舉亦皆名士也

俄 公羊傳桓公二年至乎地之與人則不然俄而可  
以爲其有矣何休云俄者謂須臾之間北周書庾信  
傳進爵義城縣侯俄拜洛州刺史俄猶尋也又通作  
蛾漢書班婕妤好傳始爲少使蛾而大幸如淳云蛾無  
幾之頃也師古云蛾與俄通

那 廣韻云奴何切爾雅云於也郭注云左傳棄甲則

那那猶今人云那那也杜注云那猶何也顧氏日知錄云直言之曰那長言之曰柰何一也愚案杜注云何也者省文也又徐禎卿談藝錄云樂府中有妃呼稀伊阿那諸語本自無義但補樂中之音耳又世說那得初不見君教兒那得何得也又盧祖臯倦尋芳詞那更柳花迎面此那字猶云如何有無柰之義麼語餘聲也王仲初詩眾中遺卻金釵子拾得從他要贖麼又方言以何事為麼事釋氏傳燈錄常云作麼生言作何事也又去聲義同

和 猶云并也王仲初詩和雪翻營一夜行

那 廣韻云與耶同顏氏家訓云那者未定之辭左傳不知天之棄魯那抑魯君有罪于鬼神那莊子天那地那漢書是那非那之類是也而北人即呼為也字亦為誤矣難者曰繫辭云乾坤其易之門那此又為未定之辭乎荅曰何為不爾愚按凡那乎與哉並有兩義一疑而未定之辭一詠歎之辭如乾坤其易之門那是詠歎辭也如管子如此而近有德而遠有色則四封之內視其君其猶父母那韓昌黎施先生墓

銘縣曰萬年原曰神禾高四尺者先生墓耶竝是詠  
歎之辭呼耶爲也固非而單訓未定其意亦狹又漢  
書成許后傳內耶若不私取小府將安所仰乎師古  
云耶語辭也按上二耶字其聲長此耶字其聲短  
乃馨之頓挫與詠歎不同又荀子榮辱篇今以夫先  
王之道仁義之統以相羣居以相持養以相藩飾以  
相安固耶以夫桀紂之道是以爲相縣也幾直夫芻  
豢之縣糟糠爾哉此耶字焉辭也又荀子勸學篇爲  
善不積耶安有不聞者乎此耶字曰辭也言爲善特

不積曰安有積而不聞者乎如漢書翟義傳欲令都  
尉自送則如勿收耶諸葛武侯正議二三子各以耆  
艾之齒承僞指而進書有若崇竦稱莽之功亦將偪  
于元禍苟免者耶二耶字竝曰辭也

些 少許之辭史邦卿夜行船詞過收燈有些寒在  
娑 世說下官家故有兩娑千萬案娑語聲猶言兩箇  
千萬也或云娑音簃一云簃去聲如楚詞些字讀

加 增多之辭也孟子寡人之民不加多漢書文帝紀  
朕親率天下農十年于今而野不加辟鮑昭寄妹書

吾自發寒雨全行日少加秋潦浩汗山溪猥至

嗟 釋名云嗟佐也言不足以盡意故發此聲以自佐也漢書匈奴傳嗟土室之人顧無喋喋佔佔冠固何當師古云嗟者歎愍之言也愚按猶云噫也又詩周頌嗟嗟臣工朱傳云嗟嗟重歎以深敕之也又詩國風猗嗟昌兮毛傳云猗嗟歎辭正義云猗是心內不平嗟是口之喑咀皆傷歎之聲故爲歎辭又戰國策威王勃然怒曰叱嗟而母婢也叱嗟者叱而且嗟一聲而兼二義一言不足以形似故云叱嗟也

遐

詩小雅心乎愛矣遐不謂矣禮記表記引詩作瑕不謂矣鄭注云瑕之言何也正義云胡何也愚按遐得爲胡者遐何音相近何胡音相近也又詩邶風泉水遄臻于衛不瑕有害朱傳云瑕何也言如是則其至衛疾矣然豈不害于義理乎又二子乘舟願言思子不瑕有害朱傳云不瑕疑辭也愚案毛傳訓遐爲遠與詩義全無干涉朱傳義長也不瑕有害猶云得無有害蓋泉水以衛女義不得歸故疑歸而有害乘舟則國人旣傷二子見害乃故爲唯恐見害之言以

哀之也不瑕得爲疑詞者不有無義瑕有何義何甯  
義通得無無甯皆疑辭也又通作霞後漢書劉昭序  
爲山霞高不終踰乎一壙

良信也果也誠也漢書五行志鄉亾桓公星遂至地  
中國其良絕矣師古云良猶信也後漢書獨行傳雖  
事非通圓良其風軌有足懷者景丹傳世祖引見丹  
等笑曰邯鄲將帥數言我發漁陽上谷兵吾聊應言  
然何意二郡良爲吾來魏文帝與吳質書古人思秉  
燭夜遊良有以也其義竝同又甚也漢書馮唐傳上

旣聞廉頗李牧爲人良說張平子東京賦良久乃言  
曰鄙哉予乎習非而遂迷也良久猶云甚久也

方當也漢書賈誼傳方今之執何以異此後漢書方  
術傳東海君有罪吾前繫于葛陂今方出之使作雨  
也魏志太祖紀注會諸將曰孤已得冀州諸君知之  
乎皆曰不知公曰諸君方見不久也又詩國風方何  
爲期朱傳云方將也將以何時爲歸期也庾子山哀  
江南賦小人則將及水火君子則方成猿鶴方亦將  
也將亦方也古人文別而義同如此類甚多非有兩

義又國風方將萬舞鄭箋云將且也愚案方將重言也又杜元凱左傳序聖人包周身之防既作之後方復隱諱以辟患非所聞也此方字始也纔也顏延年秋胡詩良時爲此別日月方向除李善注引廣雅云方始也愚按始初也又書洪範既富方穀此方字乃辭也猶云然後又水經注河伯以禮穆王視圖方乃導以西邁矣方乃重言也又史記陳涉世家趙方西憂秦南憂楚其力不能禁我外戚世家是時項羽方與漢王相距滎陽庾子山哀江南賦天子方剛詩書

定禮樂此方字正也適也又孟子周公方且膺之此方字且也尙也方且重言也言荆舒尙且爲周公所膺而陳相乃欲學許行也世說王劉與林公共看何驃騎驃騎看文書不顧之主謂何曰我今故與林公來相看望卿擺撥常務應對元言那得方低頭看此邪此方字亦是且尙之辭言故來相看何得尙低頭看此不顧也又張平子南都賦方今天地之睢刺帝亂其政豺虎肆虐真人革命之秋也李善云漢書音義云方向也謂高祖之時倉頡篇云今時辭也謂光

武愚案方今猶云向時不必以向屬高以今屬光方  
今得爲向時者反訓也爾雅訓肆爲故今訓徂爲在  
存郭注云肆旣爲故又爲今今亦爲故故亦爲今此  
義相反而兼通又云以徂爲存猶以亂爲治以曩爲  
邇以故爲今此皆詰訓義有反覆旁通美惡不嫌同  
名也

當應也合也北史源思禮傳爲政當舉大綱又漢書  
萬石君傳內史貴人入閭里里中長老皆走匿而內  
史坐車中自如固當師古云此深責之也內史貴人

正固當耳愚案固當者反言其不當也如管子仲父  
不當盡語我昔者有道之君乎漢書張釋之傳吏不  
當如此耶薛廣德傳曉人不當如是耶不當者反言  
當也又後漢書劉盆子傳謂盆子曰自知當死不對  
曰罪當應死當應重言也又王右軍帖虞生何當來  
李義山詩何當共翦西窗燭何當言何時當如此也  
又詩關雎正義云欲以采得爲次則雞鳴之作遠在  
緇衣之前鄭國之風必處檜詩之後何當後作先采  
先作後采乎魏志朱建平傳何當此子竟早隕滅戲

言遂驗乎此何當猶云何乃當字在此乃語助不爲  
義者也如蔡中郎幽冀刺史久闕疏愚以爲三五之  
禁禁之薄者以陛下威靈申明禁令在任之人豈不  
戒懼而當坐設三五自生畱閔耶魏志溫恢傳得無  
當得蔣濟爲治中耶此當字竝是乃辭語之助也又  
魏志鍾會傳文王笑曰我甯當復不知此耶當復竝  
語助省此二字讀則義明也又魏志陳羣傳注案晉  
太康三年地記晉戶有三百七十七萬吳蜀戶不能  
居半以此言之魏雖始承喪亂方晉亦當無乃大殊

此當字亦是語助猶云將也又易繫辭易之興也其  
當殷之末世周之盛德耶當文王與紂之事耶此當  
字正適之辭言正值之也又史記項羽紀當是時楚  
兵冠諸侯此當字猶云方也史記敘正事訖欲更敘  
同時事多云當是時當此之時也又魏志華佗傳佗  
久遠家思歸因曰當得家書方欲暫還耳此當字猶  
云適纔也王右軍帖適得書與此義同又吳志陸凱  
傳乃被召當下逕還赴都當下猶云卽時也又史記  
酷吏傳前主所是著爲律後主所是疏爲令當時爲

是何古之法乎當時與當下義近舉見在而言言在此一時卽爲是耳李義山詩此情可待成追憶只是當時已惘然言當下已可惘然不待追憶之也又魏志管輅傳景春與輅別戒以二事言卿性樂酒量雖溫克然不可保甯當節之甯當猶云甯可羅鄴蔣子文傳當行十里忽覺如有一黑衣人爲之導其人隨之當復二十里見大樹此當字義與可近豫爲約計之故云當也

將

楊子雲甘泉賦惟漢十世將郊上元李善云廣雅

云將欲也愚案如論語吾將問之言將欲問之也史記禮書故儒者將使人兩得之者也墨者將使人兩失之者也楚辭卜居君將何以教我諸將字竝是將欲之辭廣韻云將行也行亦欲辭故訓將爲行行得爲欲者凡有所行皆是欲如此也方欲如此而猶未如此曰將故將又通爲幾及之辭如孟子今滕絕長補短將五十里也此言不及五十里也今人乍見孺子將入于井此言幾入于井也後漢書南蠻西南夷傳若乃文約之所沾漸風聲之所周流幾將日出入

處也幾將重言也又左傳襄公二十一年猶將十世  
宥之以勸能者吳志孫堅傳卓逆天無道蕩覆王室  
今不夷汝三族縣示四海則吾死不瞑目豈將與乃  
和親耶孫皓傳注正使有之將有何失諸將字猶云  
當也又廣韻云將辭也愚案將之爲辭者謂是語助  
不爲義也然亦有分別如詩周頌將予就之此將字  
發語聲猶云抑也楚辭卜居吾甯悃悃款款樸以忠  
乎將送往勞來斯無窮乎此將字亦是抑辭然是轉  
語與上有別又如左傳襄公三年寡君將君是望敢

不稽首將君是望猶云惟君是望管子非子定社稷  
其將誰也其將誰猶云其伊誰也漢書儒林傳于是  
孔甲爲涉博士師古云孔光傳鮒爲陳涉博士死陳  
下今此云孔甲將名鮒而字甲也後漢書馬援傳季  
孟嘗折愧子陽而不受其爵今更其陸陸欲往附之  
將難爲顏乎廬山諸道人游石門詩序此雖廬山之  
一隅實斯地之奇觀皆傳之于舊俗而未觀者眾將  
由懸瀨峻險人獸迹絕逕回阜曲路阻行難故罕經  
焉此將字猶云殆也以上七條竝是語助但因文設

且字辨  
辭義各有協耳又左傳襄公二十五年烏乎詩所謂  
我躬不閱皇恤我後者甯子可謂不恤其後矣將可  
乎哉昭公三年梁丙曰甚矣哉子之爲此來也子太  
叔曰將得已乎此將字猶豈也將得爲豈者將甯也  
甯豈也轉相訓如孟子亦將有以利吾國乎此將字  
行也當也抑也甯也豈也其義竝通又孟子今滕壤  
地褊小將爲君子焉將爲野人焉朱注云言滕地雖  
小亦必有爲君子而仕者有必有爲野人而耕者愚  
案此將字猶云或也且計度之而未有一定故訓之

爲亦必有必有則已定也亦必有則未定也又顏氏  
家訓命取將來乃小豆也李義山詩收將鳳紙寫相  
思此將字今方言助句多用之猶云得也又庾子山  
春賦眉將柳而爭綠面共桃而競紅史通雜述篇子  
之將史本爲二說此將字猶與也及也又韋應物詩  
無將別來近顏鬢已蹉跎又云無將一會易歲月坐  
推遷無將猶云莫以又程伯淳詩將謂偷閑學少年  
邵堯夫云我將謂取卻幽州也將謂疑辭猶今云只  
道是也又周密謁金門詞屈指一春將次盡將次幾

欲之辭凡云次者當前舍止之處言行且及之也將欲及之而猶未及之故云將次又詩國風將子無怒毛傳云將願也鄭箋云請也又國風將仲子兮小雅將伯助予毛傳竝云將請也朱傳云將干羊切愚案此將字亦恐是發語辭如伊維之類當讀如本字

常 猶時時也漢書高帝紀常從王媪武負貫酒又高帝紀常有度此言素常有度也又高帝紀高祖常繇咸陽此常字與嘗通猶云曾也又漢書趙廣漢傳亂吾治者常二輔也此常字猶云大率又宣帝紀

尤樂杜鄠之間率常在下杜師古云率者總計之辭愚案此言杜鄠帝所最樂而大率又常在下杜也此率字猶云往往則率亦常也如于定國傳率常丞相議可韓退之柳子厚墓誌率常屈其座人竝是常常之辭豈可訓爲總計邪又水經注河水南逕北屈縣故城西十里有風山上有穴如輪風氣蕭瑟習常不止習常卽率常習非暫爲之故亦得爲常也又杜子美詩酒債尋常行處有十尺曰尋倍尋曰常今借作平常之辭尋常得爲平常者說文云五度分寸尺丈

引也十尺曰丈則常乃二丈也此皆五度最始之數  
故得借爲平常耳

長

廣韻云常也李義山詩君王長在集靈臺

嘗

廣韻云曾也試也愚案如孟子孔子嘗爲委吏矣

此嘗字曾也莊子齊物論雖然請嘗言之人閒世雖  
然若必有以也嘗以語我來此嘗字試也又漢書平  
帝紀其歷職更事有名之士則以爲難保師古云難  
保者言已嘗有罪過不可保也賈誼傳夫嘗已在貴  
寵之位天子改容而禮貌之矣已旣也旣曾也嘗已

已嘗竝重言也又論語自行束脩以上吾未嘗無誨  
焉未嘗猶未始也又史記陸賈傳每奏一篇高帝未  
嘗不稱善未嘗不猶云未有不言無一不稱善也若  
云未嘗不稱善未始不稱善其義似爲少遠未嘗無  
誨焉其辭婉哉可訓作未嘗未始也又漢書高惠高  
后文功臣表自古帝王之興曷嘗不建輔弼之臣所  
與共成天功者乎曷嘗猶云幾曾言帝王之興幾曾  
有不建立輔弼之臣而與之成天功者乎以言必無  
之也又左傳昭公六年吾君賄左右諂諛作大事不

以信未嘗可也此嘗字語助未嘗可卽未可也

相 廣韻云共也詩小雅交相爲瘡交相者彼此更其  
之也孟子相與輔相之相與者比合之辭也又漢書  
朱雲傳小生乃欲相吏耶相吏猶云見吏言欲官我  
也又白香山詩爲問長安月如何不相離自注云相  
入聲

强 多餘之辭也古木蘭詩賜物百千强杜子美詩四  
松初栽時大抵三尺强韓退之詩失勢一落千丈强  
蔣之翹云算家以有餘爲强又論語君召使擯正義

云案諸侯自相爲賓之禮凡賓主各有副賓副曰介  
主副曰擯及行人若諸侯自行則介各從其命數至  
主國大門外主人及擯出門相接若主君是公則擯  
者五人侯伯則擯者四人天子男則擯者三人所以不  
隨命數者謙也故竝用强半之數也强半猶云多半  
剛 陸魯望詩不知謝客離腸醒臨水剛添萬恨來皮  
襲美詩終然合委頓剛亦慕寥廓案方言僅如此曰剛  
適如此亦曰剛皮詩則僅辭也陸詩則適辭也

羌 楚辭王注云羌猶乃也廣韻云發語端也又通作

慶漢書敘傳恐罔蝻之責影兮慶未得其云已師古  
云慶發語辭讀與羌同又楊子雲甘泉賦直嶢嶢以  
造天兮厥高慶而不可虜彊度此慶字在句中乃語  
聲也

更 漢書萬石君傳九卿更進用事師古云更互也張  
騫傳外國使更來更去師古云遞互來去也

行 且也史記南越傳漢興兵誅郢亦行以驚動南越  
魏文帝與吳質書閒者歷覽諸子之文對之披淚旣  
痛逝者行自念也又詩國風行與子還兮朱傳云行

將也魏文帝與吳質書別來行復四年嵇康絕交書  
一行作吏此事便廢水經注呂望行年五十賣食棘  
津陶淵明詩吾生行歸休諸行字竝將辭也或云行  
年者言年歲流行且豈得爲將年邪應之曰行年之  
云今推祿命者有是言且古未之有也如一行作吏  
訓作一去作吏率是不多考古辭強爲臆解且行年  
猶云年將倒文也如漢書韓安國傳且高帝身被堅  
執銳蒙霧露沐霜雪行幾十年行幾猶云將近高帝  
定天下凡七年故云行幾十年此豈可云年歲流行

乎其不然矣又魏志華佗傳若當鍼亦不過一兩處  
下鍼言當引某許若至語人病者言已到應便拔鍼  
病亦行差此行字猶漸也行既得爲將故得轉爲漸  
也

誠 廣韻云審也信也愚案果也實也苟也孟子是誠  
何心哉此誠字果也實也魏文帝與吳質書每念昔  
日南皮之游誠不可忘此誠字信也實也史記秦紀  
夷吾謂曰誠得立請割晉之河西八城與秦呂后紀  
王誠以一郡上太后爲公主湯沐邑太后必喜此誠

字審也苟也蓋辭之未定漢書賈誼傳一寸之地一  
人之眾天子無所利焉誠以定治而已此誠字亦當  
訓苟然有聊且之意與上殊別猶云但以定治而已  
也誠得爲苟者論語苟志于仁矣朱注云苟誠也苟  
得爲誠故誠亦得爲苟誠與苟義相違而相通者反  
訓也又後漢書郭林宗傳賈子厚誠實凶德然洗心  
向善仲尼不逆互鄉故吾許其進也誠實重言也

羸 餘也杜牧之詩十年一覺揚州夢羸得青樓薄倖  
名羸得猶今云剩得也

平李義山詩平時避暑拂紅霓平常也平時常時也  
情張旭春草詩春草青青萬里餘邊城落日動寒墟  
情知海上三年別不寄雲中一雁書曾肇臨江仙詞  
情知春去後管得落花無情知猶云明知也  
生語助也李太白詩借問別來太瘦生杜子美詩生  
憎柳絮白於絲  
爭俗云怎方言如何也李義山詩君懷一匹胡威絹  
爭拭酬恩淚得乾姜夔長亭怨慢詞韋郎去也怎忘  
得玉環分付

成語助也庾子山鏡賦真成箇鏡特相宜聶夷中詩  
地底真成有劫灰真成猶云真箇箇鏡之箇猶云此  
也又李義山詩鳥言成牒訴多是恨彤襜成牒之成  
猶今云成千成萬之成成牒而訴者訴之多也又高  
觀國鳳樓梧詞不成日日春寒去不成猶今云難道  
宋人方言也

并皆也書大誥朕卜并吉又兼及之辭史記五帝紀  
余并論次擇其言尤雅者又去聲與併同

甯說文云願辭也書大禹謨與其殺不辜甯失不經

論語禮與其奢也甯儉隋書酷吏傳甯飲三升酢不見崔宏度甯茹三升艾不逢屈突蓋又詩國風甯不我顧鄭箋云甯猶曾也後漢書儒林傳今日之會甯于卿有光榮乎魏志胡質傳太祖問曰胡通達長者也甯有子孫不劉廙傳孺子孺子黃中通理甯自知不諸甯字竝訓曾也又左傳成公二年夫齊甥舅之國也而太師之後也甯不亦淫從其欲以怒叔父抑豈不可諫誨此甯字猶將也凡以將字發句多是辭之不定甯不亦者猶云將無也如後漢書傅俊傳今

日罷倦甚卿甯憊邪此言將無憊也吳志大帝傳卿好于眾中面諫或失禮敬甯畏龍鱗乎此言君猶龍鱗犯君之顏如撓龍鱗將不畏乎但云甯者省文也又左傳襄公二十九年且先君而有知也毋甯夫人而焉用老臣杜注云言先君毋甯怪夫人之所爲無用責我愚案凡言毋甯有數義此云毋甯夫人者言毋亦將怪夫人之所爲也如論語無甯死於二三子之手乎左傳隱公十一年無甯茲許公復奉其社稷襄公二十四年毋甯使人謂子子實生我而謂子浚

我以生乎此甯字亦是願辭與與其相對然與其如此甯如此是洩辭此則加無字領之便是願辭中不定之義與何如相近也杜注云無甯甯也去無訓甯其義不備又左傳襄公三十一年賓至如歸無甯蓄害昭公元年不甯唯是二十二年楚遠越使告于宋曰寡君聞君有不令之臣爲君憂無甯以爲宗羞寡君請受而戮之諸此甯字竝語助不爲義者也又吳志太史慈傳注卿則州人昔又從事甯能往視其兒子竝宣孤意于其部曲此甯字猶云定也言洩定能

如此也甯有安定之義故得爲定也又唐書劉吳韋蔣沈柳傳贊又舊史之文猥釀不綱淺則入俚簡則反漏甯當時儒者有所諱而不得騁耶此甯字猶豈也又吳志呂蒙傳如卿二人意性朗悟學必得之甯當不爲乎韓退之送張道士詩天空日月高下照理不遺或是章奏繁裁擇未及時甯當不埃報歸袖風披披甯當猶云豈可又晉書王衍傳何物老嫗生甯馨兒此甯字本作去聲與恁同俗云如此也劉夢得詩云爲送中華學道者幾人雄猛得甯馨則甯字又

可作平聲矣馨餘語聲世說冷如鬼手馨正自爾馨如馨地甯可鬪戰求勝竝語之餘不爲義也又陸暢雪詩天公甯底巧翦水作冰花甯底卽甯馨爾馨如馨也

烝 詩國風娟娟者蠋烝在桑野朱傳云烝發語辭小雅南有嘉魚烝然罩罩朱傳云烝然發語聲也

應 廣韻云當也周語叔父實應且憎以非余一人世說陛下不應憂嶠而應憂戎杜子美詩蓬萊足雲氣應合總從龍合亦應也應合重言也

仍 廣韻云因也頻也論語仍舊貫朱注云仍因也愚案此言相因而不改也後漢書馮緄傳引詩敷敦淮瀆仍執醜虜注云仍因也愚案此仍字因也爰也吳志太史慈傳注策拊掌大笑仍有兼并之志矣呂蒙傳旣而張遼至夾石間城已拔仍還此仍字因也于是也凡云爰于是者皆相因而及之辭也又漢書武帝紀今大將軍仍復克獲師古云仍頻也愚案頻數也比也周語晉仍無道而鮮胄韋注云晉厲公數行無道也孫棨北里志序鼓扇輕浮仍歲滋甚仍歲猶

比歲也

登 公羊傳隱公五年公曷爲遠而觀魚登來之也何  
休云登讀言得得來之者齊人語也齊人名求得爲  
得來作登來者其言大而急由口授也愚案今山東  
人呼得字爲德歸切與登字音近故以得來爲登來  
也又魏志管輅傳輅以爲注易之急急于水火水火  
之難登時之驗登時猶卽時也吳志鍾離牧傳注牧  
遣使慰譬登皆首服登卽登時省文也

曾 孟子爾何曾比予於是趙注云何曾猶何乃也朱

注云曾之言則也愚案曾之言則者蓋本論語曾謂  
泰山正義之說以則字亦有乃義也然訓則不若訓  
乃爲愜如詩大雅曾是彊禦曾是掎克曾是在位曾  
是在服論語曾是以爲孝乎諸曾字竝合訓乃也又  
論語曾謂泰山之曾訓作甯豈亦通廣韻訓豈爲曾  
則曾亦可謂爲豈矣又杜子美詩曾爲掾吏趨三輔  
此曾字猶云嘗也郭象莊子序夫心無爲則隨感而  
應應隨其時言唯謹爾故與化爲體流萬代而冥物  
豈曾設對獨邁而游談乎方外哉豈曾猶云何嘗魏

志王修傳注讀詩至哀哀父母生我勞瘁未曾不反  
覆流涕泣下沾襟未曾不猶云未有不

能 左傳僖公九年荀叔曰吾與先君言矣不可以貳  
能欲復言而變身乎雖無益也將焉辟之且人之欲  
善誰不如我我欲無貳而能謂人已乎能得也凡言  
能乎者猶云豈可得乎省文也漢書賈誼傳夫習與  
正人居之不能毋正猶生長于齊不能不齊言也習  
與不正人居之不能毋不正猶生長于楚之地不能  
不楚言也不能不猶云不得不洩辭也又左傳昭公

二十六年周其有髀王亦克能修其職顧氏曰知錄  
云克卽能也後漢書竇融傳豈其德薄者所能克堪  
克能能克竝重言也又論語法語之言能無從乎與  
與之言能無說乎能無猶言甯無能得爲甯者甯能  
音近也或謂能無從乎當如荀叔能謂人已乎之義  
是不能不然然則能無說乎亦可云不得不然邪其  
不然矣李義山詩固有樓堪倚能無酒可傾固有能  
無竝用論語足知能無非不得不然之義也又岑嘉  
州詩別君能幾日李義山詩未知歌舞能多少黃昇

鵲橋仙詞夜來能有幾多寒此能字亦是甯辭凡云  
能幾何猶言甯有幾何能得幾何也又羅昭諫詩我  
未成名君未嫁可能俱是不如人可能猶云可堪可  
耐能耐古通禮記禮運故聖人耐以天下爲一家以  
中國爲一人者非意之也鄭注云耐古能字也又許  
用晦詩西去磻谿猶萬里可能垂白待文王此言磻  
谿旣已迢遠如何能以垂白之年待文王之求乎義  
與可堪相近又李義山詩堪歎故君成杜宇可能先  
主是真龍此可能乃不定之辭猶云未必能也言蜀

險雖足倚仗而天命不可假易不惟故君已成杜宇  
卽恐先主亦非真龍故結云將來爲報奸雄輩莫向  
金牛訪舊蹤也又韓偓之詩杏花兩株能白紅皮襲  
美詩檜身渾箇矮后面得能顛唐子西詩桃花能紅  
李能白此能字與恁同亦可作去聲方言箇樣也得  
能卽箇樣吳人語也

恆 常也左傳文公八年楚國之舉恆在少者又蔡中  
郎陳政要七事恆思皇后祖載之時東郡有盜人妻  
者亾在孝中本縣追捕乃伏其辜此恆字猶曾也嘗

也恆既訓常而嘗與常通轉相訓也

勝 漢書景帝紀朕既不敏弗能勝識師古云勝識盡知之愚案勝訓盡者勝是負之對謂優過之也識優故盡知之如史記陳涉世家當此之時楚兵數千人爲夥者不可勝數此言爲夥者多亦有優過之意故不可悉數也三王世家臣竊不勝犬馬之心不勝猶云無任謙言犬馬愛主之心無有窮盡亦優過之意也勝本訓堪也當也力優乃能任負而不匱絀故勝與任通也

尤 益甚之辭也史記五帝紀余并論次擇其言尤雅者故著爲本紀書首漢書卜式傳是時富豪皆爭匿財唯式尤欲助費世說秋冬之際尤難爲懷

猶 廣韻云與猷同爾雅云猷可也郭注云詩曰猷來無棄者來無棄可今通言疏云皆可也詩曰猷來無棄者魏風陟岵文也可今通言者邶風終風云惠然可來是也愚案猷訓爲可者猷尙也尙庶幾也猷有庶幾之義故得爲可也凡云可者唯恐其不可故可爲庶幾也如書盤庚汝猷黜乃心之猷亦當訓作可舊注

訓作謀猷之猷恐非是左傳昭公三年張趯有知其猶在君子之後乎顧氏補正云言庶幾可以爲君子也蓋人臣雖有諱國之禮然或憂其將亂而私語之于友不害其爲忠此叔向晏子之言所以不譏于君子也愚案傳謂張趯先知晉將失諸侯庶幾不愧識微之君子故云在君子之後杜注以爲譏其無隱諱是以猶爲不滿之辭也恐非如柳子厚捕蛇者說孔子曰苛政猛於虎也吾嘗疑乎是今以蔣氏觀之猶信此言庶幾因蔣氏之事而信苛政猛於虎之言也

或問魏風陟岵云上慎旃哉猶來無止上與尙同庶幾辭也上已爲庶幾矣何有猶來又爲庶幾曰茲所謂重言也如阮嗣宗詩多言焉所告繁辭將訴誰沈休文云重言之猶云懷哉懷哉古人如此類者不少也又爾雅云猷若也郭注云詩曰實命不猷疏云若如也論語文莫吾猶人也朱注云言不能過人而尙可以及人也大學聽訟吾猶人也朱注云猶人不異于人也愚案如若皆及辭相及故不異也又爾雅云猷已也書大誥王若曰猷大誥爾多邦又云已予惟

小子若涉淵水孔傳云已發端歎辭也蔡傳云猷發語辭也猶虞書咨嗟之例愚案爾雅既訓猷爲已則猶已義通孔傳既訓已爲發端歎辭則蔡傳訓猷爲發語辭者是也猶得爲發語者猶有如若之義如若亦是語助也已得與猶通者已字是猶字發聲音之轉也又論語猶之與人也出納之吝謂之有司孔注云猶之與人謂財物俱當與人左傳襄公十年子驩曰諸侯既有成行必不戰矣從之將退不從亦退退楚必圍我猶將退也不如從楚顧氏補正云邵氏云

猶將退猶言同一將退也戰國策燕王與樂閒書柳下惠曰苟與人之異惡往而不黜乎猶且黜乎甯於故國愚案猶之猶俗云總是論語謂財賄總之要當與人者雖吝無謂而乃出納之吝是有司也子驩謂諸侯總是欲退者與其退而終被楚圍不如即從楚也柳下謂總之見黜于人不如仍在故國蓋通前後而爲計慮之辭也又春秋文公六年閏月不告朔猶朝于廟公羊傳云猶者何可止之辭也愚案猶尙也此云猶朝者是未絕之辭言雖不告朔猶且往朝于

廟故傳云可止也又孟子且以文王之德百年而後崩猶未洽於天下此猶字亦尚辭也然與前義不同此言以文王之德百年之久尚且未洽於天下何況諸餘也又戰國策蘇代云今夫齊王長主也而自用也南攻楚五年穡積散西困秦三年民憔悴士罷敝北與燕戰覆三軍獲二將而又以其餘兵南面西舉五千乘之勁宋而包十二諸侯此其君之欲得也其民力竭也安猶取哉注云言齊不可復攻取愚案安猶取者言尚安所攻取也又左傳僖公四年一薰一

蕪十年尚猶有臭漢書賈誼傳天子春秋鼎盛行義未過德澤有加焉猶尚如是顧氏日知錄云尚卽猶也愚案尚猶尚竝重言也又莊子堯以天下讓許由許由不受又讓于子州支父子州支父曰以我爲天子猶之可也雖然我適有幽憂之病方且治之未暇治天下也猶之可若云或可也猶得爲或者庶幾之轉也如孟子王庶幾改之此將冀幸其或然與繫辭顏氏之子其殆庶幾乎義別又廣韻云似也愚案似也如也孟子猶緣木而求魚也又云周公之不有

天下猶益之於夏伊尹之於殷也此猶字亦不異之  
辭然與論語大學猶人之猶有別又禮記內則子弟  
猶歸器衣服裘衾車馬則必獻其上而后敢服用其  
次也鄭注云猶若也子弟若有功德以物見饋賜當  
以善者與宗子愚案此猶字是假設之辭或問下文  
云若非所獻則不敢以入於宗子之門何以異文云  
若曰若非者又是別異之辭殊于上文者也又公羊  
傳襄公二十九年今若是迕而與季子國季子猶不  
受也管子能強其兵而不明於勝敵國之理猶之不

勝也又云國猶是國也民猶是民也桀紂以亂亾湯  
武以治昌此猶字仍也與春秋猶朝于廟之猶相近  
而義別又司馬相如封禪文夫修德以錫符奉符以  
行事不爲進越也故聖王弗替而修禮地祇謁款天  
神勒功中嶽以章至尊舒盛德發號榮受厚祿以浸  
黎元皇皇哉斯事天下之壯觀王者之不業不可貶  
也願陛下全之而後因雜摺紳先生之略術使獲耀  
日月之末光絕炎以展采錯事猶兼正列其義祓飾  
厥文作春秋一藝孟康云猶因也愚案猶有仍義故

得轉為因也又與由通孟子然而文王猶方百里起是以難也此言從方百里之地而起故難也

由 與繇同爾雅云由從自也孟子何由知吾可也史記三王世家自古至今所由來遠矣漢書文帝紀今法有誹謗詆言之罪是使眾臣不敢盡情而上無由間過失也刑法志今人有過教未施而刑已加焉或欲改行為善而道亾繇至諸由字竝訓從也又史記高帝紀由所殺蛇白帝子殺者赤帝子故上赤此由字因也又孟子由是則生而有所不用也由是則可

以辟患而有不為也由是猶云爰是由得為爰者由因也因爰也轉相訓又廣韻云由用也書康誥乃其速由文王作罰孔傳云言速當用文王所作違教之罰又與猶通孟子王由足用為善言尚可以為善也劉琨答盧諶書譬由疾疾彌年而欲以一丸銷之譬由即譬猶猶云譬如也

攸 爾雅云所也易利有攸往書洪範彝倫攸敘漢書五行志引書作彝倫道敘班孟堅幽通賦栗取弔于道吉兮王膺慶于所憾師古云道古攸字攸亦所也

又詩大雅四方攸同蜀志後主傳遂與京畿攸隔萬里此攸字語助不爲義也

疇 爾雅云孰誰也邢疏云皆謂語辭不爲義也愚案誰何也故邢疏云語辭也漢書司馬相如傳疇逆失而能存言何有逆失而能存也

休 方言莫也李義山詩西來雙燕信休通溫飛卿詩休向人閒覓往還

侯 爾雅云伊維也伊維侯也郭注云詩曰侯誰在矣互相訓邢疏云皆發語辭轉互相訓邶谷風云伊余

來暨大雅大明云維此文王小雅六月云侯誰在矣又爾雅云侯乃也鄭樵云侯維也維亦乃也乃引辭也不絕之義也愚案如周頌侯主侯伯侯亞侯旅侯疆侯以此侯字在句首發語辭也如小雅亶侯多藏此侯字在句中語助辭也亶侯猶云信維也又廣韻云何也漢書司馬相如傳君乎君乎侯不邁哉師古云侯何也言君何不行封禪也又史記樂書高祖過沛詩三侯之章令小兒歌之索隱云過沛詩卽大風歌侯語辭也沛詩有三兮故云三侯愚案侯兮義旣

且字辨田  
同則侯亦得爲語已辭也

尋旋也隨也羊叔子讓開府表以身誤陛下辱高位  
傾覆亦尋而至宇文道庾子山集序尋轉尙書度支  
郎中凡相因而及曰尋猶今云隨卽如何也

臨猶及也謂正當其時也漢書杜欽傳方進素與司  
直師丹相善臨御史大夫皐使丹奏咸爲姦利請案  
驗卒不能有所得而方進果自得御史大夫世說王  
大爲吏部郎嘗作選草臨當奏又云公長民短臨時  
不知所言張文昌詩行人臨發又開封王仲初詩臨

上馬時齊賜酒劉夢得詩平章宅裏一闌花臨到開  
時不在家

今卽辭也漢書汲黯傳君薄淮陽邪吾今召君矣此  
言卽召其還也又周語惠王十五年有神降于莘王  
問于內史過曰今是何神也此今字猶此也今是當  
下之稱故得爲此也卽也

任廣韻云當也左傳成公三年臣不任受怨君亦不  
任受德不任猶云不當也荷之于身謂之任當有任  
受之義故任得爲當也又吳志諸葛恪傳卒腹痛不

任入此任字猶能也又謝眺謝左傳啟伏銘私荷不任下情此不任猶云不勝也義見勝字條下

深 極也甚也世說子猷言語殊不遜深不可容宇文

道庾子山集序深為梁主所賞

堪

廣韻云任也勝也左傳隱公元年國不堪貳又云

君將不堪桓公二年民不堪命不堪猶今云當不得

也任即當也優任之故又得為勝也盧綸詩舊業已

隨征戰盡更堪江上鼓鼙聲此堪字猶云那堪省文

也又李義山詩黃金堪作屋此堪字猶云可也

兼 廣韻云并也漢書趙廣漢傳亂吾治者常二輔也

誠令廣漢得兼治之直差易耳水經注今濟北東阿

東北四十里有故清亭即春秋所謂清者也是濟水

通得清之目焉亦水色清深用兼厥稱矣韓退之詩

今日嶺猿兼越鳥

咸 爾雅云僉咸胥皆也書咸有一德俾萬姓咸曰大

哉王言

僉 書舜典僉曰伯禹作司空

凡 說文云最括也愚案大率也一切也詩小雅凡今

之人莫如兄弟孟子故凡同類者舉相似也此凡字一切之辭也史記吳世家大凡從太伯至壽夢十九世韓退之伯夷頌今世之所謂士者一凡人譽之則自以爲有餘凡人沮之則自以爲不足大凡一凡竝大率也又史記高帝紀凡吾所以來爲父老除害非有所侵暴毋恐此凡字猶云總之蓋安民之意不可勝舉故括言之也漢書萬石君傳于是景帝曰石君及四子皆二千石人臣尊寵迺舉集其門凡號奮爲萬石君師古云凡最計也總合其一門計五人爲二千石故號萬石君又廣韻云皆也荀子榮辱篇故與人善言煖于布帛傷人之言深于矛戟故薄薄之地不得履之非地不安也危足無所履者也凡在言也楊注云凡皆也

助字辨略卷二終

嘉興李文杏實盦校

助字辨田卷一

助字辨田卷一



與不善言與千本具與人  
二千亦如與萬以保及以

